

Cabesante Victor Lopez:

Hopi hoben ta cay den alcoholismo y drogadiccion pa huy di un realidad no desea

ORANJESTAD (AAN) -- Den entrevista cu DIARIO, señor Victor Lopez, cabesante di Mon Plaisir College MAVO, a comenta cu na Aruba nos ta yegando na e fase cu nos ta un tiki laat pa controla cierto problemanan social. Sinembargo, e ta haya cu Aruba no ta laat ainda compara cu otro paisnan, por ehemplo Hulanda pa loke ta trata consumo di alcohol y droga. Na Hulanda, el a bisa e problema ta mucho mas grandi cu na Aruba y aya ta combinacion di droga cu alcohol cu maske nos tine na

Aruba, na Hulanda ta mas alarmante.

TRES ASPECTO PRIMORDIAL:

Ta conoci cu na henter mundo consumo di alcohol, drogadiccion, of un combinacion di ambos ta hunga un papel crucial den tur sorto di problemanan social cu ta existi.

Aruba tambe ta conoce un margen di dje maske sea chiquito.

Analizando e pakico di tanto consumo di alcohol y droga bao un grupo di nos hobennan.

Señor Lopez a señala tres aspecto cu por ta e causa:

1) E por tin di haber cu e hecho cu hubentud no tin ningun actividadnan sano pa haci uso di dje.

2) Hopi biaha uso di alcohol y/of droga ta un forma pa hobennan huy for di un realidad no desea.

3) Cultura di cas, ora cu e ehemplo cu nan ta haya den cas, ta cu bebemento ta normal.

Riba e aspecto aki, señor Lopez a expresa cu ta hopi e adultonan cu ta dunando nos hobennan e ehemplo ey, specialmente tatanan, ya cu e problema aki ta presenta hopi mas bao hende homber cu bao hende muher.

Na su opinion e caracter machista tambe ta hunga un rol aki, ya cu tin hendenan homber cu ta kere "cu mas nan ta bebe mas homber nan ta", y "mas hende muher bo conquista mas homber bo ta".

Señor Lopez tambe ta preocupa pa e situacion di abuso domestico na Aruba ya cu e ta bao impresion cu esaki ta aumentando den nos comunidad, y cu tambe por ripara den diferente hoben cu tambe ta maltrata nan partner.

BUSCANDO

ALTERNATIVANAN:

Señor Victor Lopez a indica cu e situacion aki mester worde mira como un asunto individual y como un problema nacional, pasobra e ta afecta henter nos comunidad.

"Berdad a bira tempo pa nos cuminza crea situacionnan sano, pa e hobennan por recrea despues di school, por ehemplo, pa den oranan liber nan tin un forma pa distrae nan mes.

Stimula mas actividadnan deportivo, y riba tereno di cultura cu tin posibilidadnan hopi amplio, manera den musica, teatro, pintura, literatura, etc.

Ningun hende por bisa mi cu nos hobennan no tin e habilidadnan aki, pasobra nan ta sumamente talentoso.

Pakico nos no ta saca afo nan potencial?"

Tambe señor Lopez ta haya cu e cuida pa nos hobennan mester mehora, pero no solamente laga cas so haci e trabao, pero en general.

"Polis tambe cu riba caya tin un tarea educativo pa coregi nos hobennan; salubridad publico, pasobra nos por wak

con e alimentacion di nos muchanan ta; nan ta lanta cu pastechi cu refresco mainta tempran pa desayuna. Esaki tambe tin di haber cu e cuida en general di nos hobennan", señor Lopez a expresa.

El a agrega cu ora nos bisa "nos yiunan" no kiermen cada un di nos so como mayor, pero nos hobennan ta parti di nos tur como comunidad.

RIBA TERENO ESCOLAR:

Den enseñanza, Victor Lopez ta kere, a yega tempo enberdad pa schoolnan haya mas facilidad pa brinda e alumnonan. E generacion aki a nace cu e decision den nan man, unda den tal of cual direccion nan kier bay, segun e cabesante a bisa.

"Bay wak nos schoolnan. Cuanto school tin 'computer-lokaal?': un of dos? Esunnan cu a worde traha ultimo tempo ta EPB, mientras cu EPI mes ainda no ta cla. Di e resto ningun tin. Na e school aki mes nos no tin ainda ni un computer pa estudiante. Un so nos tin den kantoor. Computer ta algo sumamente pa nos hobennan di awendia pa nan siña con pa haya nan informacion.

E problema ta cu nos como docente no por duna nan mas e maximo informacion, pasobra tin asina tanto cu nos no por capte. Loke nos tin cu haci ta cambia nos manera di traha y siña nan con pa nan haya nan informacion. Esey ta e tarea di e docentenan di awendia, y esey ta loke e studiantenan tambe kier: 'duna mi e herment y mi ta bay traha'".

Victor Lopez a agrega cu actualmente schoolnan por busca cuanto buki cu kier for di Hulanda, pero no tur ta bukinan adecua pa Aruba. Pesei hopi maestro ta adapta nan les, pero ta stencil mahos e muchanan ta haya, loke riba su mes no ta un estimulo pa e hoben. "Y esaki, den año 2001!", e cabesante a expresa.

Otro aspecto cu el a menciona ta cu den e gran mayoria di school e studiantenan no ta conta cu un cantina pa e muchanan por sinta come y bebe algo, y recrea. Tampoco tin un biblioteca pa nan.

Pa loke ta trata e ambiente pafo di school, señor Lopez ta lamenta e estado den cual hopi veld deportivo ta. Sporthall ta apenas un of dos tin, loke no ta suficiente pa e cantidad di muchanan cu kier haci deporte, y encunto arte: teatro, musica, pintura, etc., tin hopi hende capacita na Aruba cu kier siña nos muchanan, pero e terenonan aki no ta worde subsidia.

CONCLUSION:

En conclusion: e posibilidadnan mester worde crea pa habri caminda pa nos hobennan tin mas actividad recreativo pa haci despues di school, pa saca afo nan potencial y kita nan di for di riba caya.

Cada un como mayor, como maestro, como ciudadano, como politico, y como comunidad mester profundiza riba kico nos ta ofreciendo nos hobennan, y con pa trece cambionan positivo pa garantiza un futuro mas sano pa nos hubentud.